

Poiravaint d'se fiaie
En ces chirs,
Ais fa vérifiaie
Yos bés dirs,
Les prayie d'dainsie
In p'tét cò,
Les léchie paiyie
Yot'écho.

Main s'ais fa dainsie,
Ais sòlan;
Tiain qu'ais fa paiyie,
Ais rébiant;
Ais n'aint que lais blague
Ces bouebas,
Oui, bîn pu de blague
Que d'touba!

Refrain:

Oh! qu' ais sont bés
Aidmiraie yos jaquettes!
L'échprit qu'ais yos fa pou femaie
Lais cigarette!



F.  G.

Les meilleures filles du pays.

Les moiyoues Féyes di payis

Refrain :

Les moiyoues féyes di payis,
Çà cés qu'ainmant nos rédjouyis;
Sain se fair' prayie,
Que vlan paitaidgie
Tot c'que l'Bon-Due yos ai baiyie.

Cà lais Marianne de Coidgdoux,
Que vos faie les euy's les pu doux,
Ran qu'en vos midiaint djentiment
Elle vos troubye l'entend'ment,
Tain que les bouebes de ci yue
En aint rébiaie de prayie Due.

Lais pu rétche féy' di payis,
Çà lais Djeannatte de Faiyis;
Ell' s'à bottaie dain lais cervelle
D'avoi le moiyou boueb' d'lais velle;
Pou le trovaie elle ai djurie,
Ma foi, de tu les essayie.

Çà lais Thérèse de Mieco,
Que faie djasaie les dgens béco;
An dit qu'elle ai ïn chi bon tiuer,
Que pie-p'un d'ses aimoireux n'puer;
Putot qu'fair djaloux ïn soudaie,
Elle ainmerait tote l'airmaie.

Lais grosse Anna de Coirdgenaie
N'à djemais tain bïn repïmpnaie,
Main les aiyons de lais coéyatte
N'aidjoutant ran en lais baichatte;
In tié-tiun boueb' que l'ai vu dit:
Ell' me piaie meu moins bïn véti.

Y'un des bés paitchis de l'Aidjoue,
Çà lais Mélina de Roétch'd'oue,
Qu'à-t-aivu bïn fiaincie vaintt'côs
Pou recidre aïtain de cados;
Voili ïn trôsé bïn montaie:
Aivis en cés qu'vlan l'augmentaie.

Lais Rosalie de Rétchégy
N'aime ran tain que le piaigi;
Dain lais fremier' de ses aimis,
Yun l'ai pityai tot endremi;
Ma foi, lais pityur' s'enveulma:
Çà malaigie de dir' tyu ça!

Main les baichattes de Cornô
Voidgeant yos petés tiuers pou nos,
Ah! s'vos saivîn c'qu'ell' sont dgenties,
Vos s'rîns content de paitaidgie;
Dain yos p'tés tiuers, en se serrain,
An y tînt cent, ça bîn certain!



Le vieux garçon.

Le véye bouebe

I aie pésaie mes quarante ans,
Mes dents sont tchoé, mon poi à bian,
Mon airdgent, i l'aie dépensie
En moinain bîn djoyeuse vie;
Mitnain que me voili véyat,
Ais me fâ ainne fanne en l'ôta;
I l'ais veu rétche, belle et djuenatte,
Y' ainne que feuche encoé puç'natte.

D'à vaint ans qu'i vais a dammaidge
En lais velle c'ment a velaidge,
Bîn des baichatt's airîn velu
M'aittaipaie, s'ell' aivîn poéyu;
Main tiain qu'ell' aivîn, les folattes,
Oeuvie pou mon naie yos baigattes,
Voili qu'în po pu loin i fiô;
Ais-Due le mairiaidge! qu'i yos diô.

I aie poitcho ïn po reugnaie,
Ais droite, ais gatche i aie fregnaie ;
Les belles me coignéchant tu :
I aie savaie tain de vertu ;
Main i crais qu'i aie prou rôlaie,
Qu'i en aie bïn trop endjolaie ;
Ais ne fâ-p'être tro véyi
S'an veu d'sais fanne ancoé djouyi.

Mes bons aimis, i aie fini,
D'aivo vos de m'y rédjouyi ;
D'jmais nos n'adrains pu demaïndaie
Poichi, poili, lais tchairitaie ;
Me farai voidgeaie mais mageon,
Mais fanne et mes petés diaichons ;
I vos çouraie lais pouetche a naie,
Sain quoi i s'ro vite encouennaie.

Refrain :

Dïnce-que-dïnce ais fâ me mairiaie,
I n'sero pu faire atrement ;
Ais fâ qu'i m'résigneuche d'entraie
Dain le settieme sacrement.

Lais demainde en mairiaidge

Refrain :

bis { François, François,
I aie faie mon tchoix,
Mon tiuer â promis

1. En in âtre aimi;
2. Çâ tâ qui vos l'dit!

I aie donc botaie
Mais tiulate de midglaine,
Mais blode brodaie,
Mon gilet de futaine;
I m'en seut allaie
Trovaie lais féye di maire
Pou lais demaindaie
En mairiaidge en son pére.

Main li-d'chu,
Ell' m'ai réponju: (*Refrain*)



La demande en mariage.